

Bentuk Negara Khalifah dalam Islam

(oleh: Abdul Kahar Muzakir)

Islam dengan sepenuh keyakinan mempercayai dirinya sebagai satu agama yang hidup dan sesuai dengan metodi-metodi ilmu pengetahuan; agama yang sesuai dengan bentuk alam pemikiran manusia di segala zaman di dalam semua keadaan dan tempat.

(Sambungan Qalam bilangan 207)

3. Agama Sebagai Dasar Negara:

Dengan cara sepintas lalu – di bahagian yang lalu – telah kita terangkan serba sedikit tentang kedudukan agama-agama yang ada di dalam masyarakat dunia di hari ini, yaitu seperti agama Kung Fu-tze, agama Shinto, agama Hindu, Buddha dan sebagainya, yang sedikit pun juga tidak diperkatakan oleh Tuhan di dalam kitab-kitab Taurat, Zabur, Injil dan al-Qur'an.

Berdasarkan ini, maka nyatalah bawa agama-agama yang tersebut hanyalah sebagai agama yang diwarisi dari nenek moyang, bukannya agama yang diturunkan dari langit dan bukan pula agama yang diwahyukan oleh Tuhan.

Selain dari itu telah juga kita terangkan bawa agama Yahudi dan agama Nasrani yang ada di dalam masyarakat dunia sekarang, bukan lagi agama Yahudi dan agama Nasrani yang tulen sejati, oleh kerana ajaran-ajaran dari kedua-dua agama itu telah dirosak, telah dikotori, telah diubah dipinda dan

diganti dengan fikiran kolot dan tangan manusia yang bernoda.

Dengan yang demikian maka jelaslah bawa **agama** yang dapat, boleh dan wajib dipersatu-padukan dengan negara, untuk menjawai segala cita-cita hidup negara, untuk memimpin segenap lapisan masyarakat negara dalam segala lapangan hidupnya ialah agama **Islam**, lain tidak.

Oleh itu setiap usaha manusia untuk mempersatukan negara dengan agama (di luar Islam) pasti menemui kegagalan, kekacauan, dan kerusuhan, sebab undang-undang lain – kecuali agama Islam – tidak mempunyai dasar dan landasan hidup kenegaraan. (Siapa yang tidak percaya, bolehlah uji dan cuba kesekian kalinya).

Perjuangan kita bagi mempersatu-padukan agama dengan segala urusan negara adalah berdasarkan "Sunnah Nabi". Berdasarkan ajaran, didikan dan pimpinan Nabi Muhammad (SAW) yang tulen sejati, bukan tiruan, bukan saduran dan bukan lencongan dari buah fikiran manusia

mana pun juga di muka bumi ini.

Tidak mustahil, bawa dalam perjuangan kita mengulangi jejak langkah Nabi Besar Muhammad (SAW) untuk mempersatukan agama dengan segala urusan negara, maka golongan dunia Barat, golongan dunia Komunis dan golongan masyarakat dunia lainnya – di luar Islam – akan mentertawakan kita, akan mengejek kita dan seterusnya akan menuduh kita menegakkan "tirani angan-angan kosong", sebagaimana juga tuduhan-tuduhan yang telah mereka lemparkan terhadap Islam dimasa-masa yang lalu.

Segala cemuhan, ejekan, dan tuduhan-tuduhan penghinaan yang mereka lemparkan kepada kita, akan kita terima dengan segala senang hati, akan kita sambut dengan segala hormat. Segala cemuhan, ejekan dan tuduhan-tuduhan mereka yang tidak berdasarkan itu, kita kembalikan kepada mereka dengan pernyataan yang tegas tendus, bawa bentuk negara, suasana negara dan cita-cita hidup negara yang di luar ajaran Islam itu, adalah

Berita-berita Islam.

Bentuk Negara khalifah.....

menghasilkan negara yang dikuasai krisis moral, negara peperangan, negara pemberontakan, negara perkosaan zahir dan batin.

Kita juga bersedia dan bersenang hati ditertawa dan dianggap, bahawa Islam adalah suatu agama yang berdasarkan keklotan, *orthodox*, konservatif dan sebagainya, sebab kita tahu bahawa segala golongan orang yang mentertawa dan mengejek-ngejek dasar-dasar agama Islam yang telah diakui Tuhan akan kemuliaan dan kesuciaannya itu, adalah terdiri dari golongan manusia yang dipermain-mainkan oleh rasio hawa nafsu, terdiri dari golongan manusia yang diperbudak dan diperhambakan oleh fahaman-fahaman beku dan kasar.

Kerana itu segala cemuh dan ejekan yang dilemparkan kepada Islam itu akan kita hadapi dengan sikap tegas mengatakan, bahawa Islam tidak mengenal istilah “*Orthodox*” dan “*Moden*”.

Islam dengan penuh keyakinan mempercayai dirinya sebagai satu agama yang hidup dan sesuai dengan metodi-metodi ilmu pengetahuan, agama yang sesuai dengan bentuk alam pemikiran manusia di segala zaman, keadaan dan tempat.

Islam mempunyai pandangan yang tajam dan keyakinan yang penuh terhadap ajaran-ajaran yang dibawanya, bahawa bukan manusia yang menciptakan alam semesta, bukan manusia yang menciptakan segala sumber hidupnya dalam lingkungan alam semesta ini,

dan kerana itu tidak layak, tidak pantas dan tidak wajar bagi akal fikiran kalut dari golongan manusia yang derhaka kepada Tuhan mempermain-mainkan nasib hidup manusia yang lain di buka bumi yang luas terbentang ini.

Islam dengan tegas menyatakan bahawa: “Sama ada mereka suka atau tidak mestilah mengakui akan adanya Tuhan yang Maha Esa”, akan tetapi matahari bulan, segala bintang-bintang yang bertaburan di langit, segala angin taufan, angin ribut, angin sepoi-sepoi, bumi dan “titisan mani” yang menjadi asal kejadian manusia, kesemuanya naik saksi, mengakui adanya Tuhan yang Maha Esa dan Maha Tunggal, yang mewahyukan ajaran-ajaran agama Islam menjadi hukum pergaulan hidup di permukaan bumi ini. Dan oleh itu **agama** wajib dan mutlak dijadikan dasar pemerintahan sesuatu negara, **agama** dipersatukan paduan dengan negara. (Demikianlah pandangan hidup Islam).

Tentang kelemahan-kelemahan kita dewasa ini memang kita akui, bahawa golongan kita umat Islam dalam abad nuklear ini sangat ketinggalan dalam lapangan ilmu pengetahuan umum, dan sangat mundur di lapangan sains dan teknik.

Kita akui juga, negara-negara Islam pada hari ini tidak mempunyai “angkatan perang besar” yang dilengkapi dengan alat-alat senjata nuklear yang moden.

Akan tetapi di sebalik itu semua orang tidak boleh melupakan, bahawa golongan kita umat Islam mempunyai

dua macam senjata raksasa yang tidak ada tolak bandingnya di seluruh permukaan bumi yang luas saujana ini, iaitu “Tauhid” dan “Moralism agama”.

Sekalian orang harus mengakui, bahawa hanya golongan kita umat Islam sahajalah satu-satunya yang mempunyai kekuasaan, falsafah kedaulatan dan falsafah demokrasi yang tulen sejati.

Segala orang harus mengakui, bahawa hanya golongan kita umat Islam satu-satunya yang mempunyai sifat ketinggian moral. Dengan menggunakan kedua-dua macam senjata sakti inilah kita menyeru seluruh umat manusia yang sejenis dan seasal keturunan dengan kita agar mereka kembali kepada ajaran-ajaran agama yang sebenarnya.

Dengan kedua macam senjata inilah kita sanggup memikul tanggungjawab dunia damai, dunia persaudaraan manusia dan dunia Islam.

Seterusnya dengan kedua macam senjata inilah kita membangkitkan kembali sendi dasar kenegaraan Islam di atas landasan hidup bermoral dan politik yang kukuh kuat.

Kita percaya dan yakin dengan sepenuhnya, bahawa berdiri tegak dengan kedua-dua macam senjata raksasa yang luar biasa itu, kita akan dapat menolong masyarakat dunia yang sedang berada di dalam suasana centang-perenang dan bergelora ini. *In shā-Allāh.... Amīn!*

Bersambung.